

## **„UNSKI SMARAGDI“ Bihać – Šampion zaštite prirode u kategoriji Organizacije/NVO/Fondacije**

Društvo za stvaranje kulture čuvanja i zaštite rijeke Une, „UNSKI SMARAGDI“, osnovao je Boško Marjanović, 17. maja 1985. godine. Udruženje radi na ekološkom obrazovanju djece i odraslih, podiže ekološku svijest na viši nivo, obrazuje mlade generacije o održivom razvoju, uči ih selektivnom zbrinjavanju čvrstog otpada, smanjenju emisije štetnih polutanata, zamjeni fosilnih goriva sa obnovljivim energetske izvorima, uštedi energije, očuvanju i racionalnom korištenju naših prirodnih resursa – vode i šuma, te izučavanju osnovnih principa demokratije, kao i ovladavanju pravilima parlamentarnog odlučivanja putem Dječjeg ekološkog parlamenta.

Svojim najvećim ekološkim korakom smatraju „Unu - Nacionalni park (NP „UNA““, jer su u mnogome doprinijeli njegovom proglašenju: od ideje do ostvarenja, što dokazuju značajni naučni skupovi i tribine koje su organizovali Unski Smaragdi, a koji su Uni dali naučnu dimenziju i na osnovu kojih je Zavod za zaštitu kulturno – historijskog i prirodnog naslijeđa BiH, još 1995. godine, nominirao „prirodni fenomen“ – rijeku Unu na preliminarnu listu UNESCO –a. Naučni skupovi i tribine su dokazali da rijeka Una ispunjava tri uvjeta, od moguća četiri, koja su predviđena kriterijima Konvencije.

Jedan od najvećih zadataka Unskih smaragda je staviti Unu u funkciju turizma i na njoj razvijati dječji ekološki, rekreacijski, naučni i kulturni turizam, promovirati njene prirodne ljepote od kojih bi se moglo bolje i kvalitetnije živjeti, te vrijednosti NP „UNA“

„Unski smaragdi“ su istinski vjesnici ekološke civilizacije i Bihać – Svjetska metropola dječje ekologije, zagovaraju cjeloživotno /od rođenja pa do kraja života/, interdisciplinarno ekološko obrazovanje o održivom razvoju, kao globalni princip, koji je jedinstven za cijeli svijet, jer se samo takvom jedinstvenom ekologijom može spasiti čarobni prirodni sklad, koji je karakterističan samo za našu planetu Zemlju, koja treba da diše kao živi organizam.

U tom prostoru je i rijeka Una, koja je po ljepoti veličanstvena, osobita i jedinstvena, i kao takva, ona nije samo naša, već rijeka cijelog svijeta.

Za svoje originalno ekološko stvaralaštvo u radu sa djecom, Unski smaragdi osvojili su niz domaćih i svjetskih priznanja:

- GLOBAL 500 UN 1990.godine za originalno ekološko stvaralaštvo djece i omladine;
- POVELJA za regionalnu suradnju REC-a Sarajevo;
- POVELJA PK USK-a za doprinos u održavanju Međunarodnog sajma „EKO – BIS“;
- PLAKETA VLADE USK-a za poseban doprinos u zaštiti životne sredine;
- GRB grada Bihaća za učešće u manifestaciji: „Bihaćko ljeto“, te više;
- ZAHVALNICA i DIPLOMA DJEČIJEM EKOLOŠKOM PARLAMENTU/DEP/. Unski smaragdi imaju i svoj DJEČIJI EKOLOŠKI PARLAMENT (DEP), koji je 1998. godine proglasio POVELJOM: BIHAĆ-EKOLOŠKIM GRADOM DJECE;
- Nagrada „ŠAMPIONE ZAŠTITE PRIRODE“ 2018. godine.

